

PKPB: PDRM tubuh Task Force Operasi Pematuhan

Astro Awani

05 Mei 2020

Fauzi Suhaimi,

PUTRAJAYA: Polis Diraja Malaysia (PDRM) menubuhkan Task Force Operasi Pematuhan bagi pemantauan dan penguatkuasaan pematuhan prosedur operasi standard (SOP) Perintah Kawalan Pergerakan Bersyarat (PKPB) di seluruh negara.

Menteri Kanan (Kluster Keselamatan), Datuk Seri Ismail Sabri Yaakob berkata, pasukan khas itu terdiri daripada 14 agensi kerajaan yang diberi kuasa oleh Kementerian Kesihatan Malaysia (KKM) untuk pelaksanaan pematuhan PKPB berkenaan.

"Antara agensi itu termasuk Angkatan Tentera Malaysia (ATM); Angkatan Pertahanan Awam Malaysia (APM); Agensi Penguatkuasaan Maritim Malaysia (APMM); Jabatan Sukarelawan Malaysia (Rela) dan Jabatan Pengangkutan Jalan (JPJ).

"Jumlah anggota Task Force itu akan ditambah lagi seperti Lembaga Pembangunan Industri Pembinaan Malaysia (CIDB)," katanya dalam sidang media harian pada Selasa.

Dalam pada itu, Ismail Sabri berkata, pasukan Pematuhan Perintah Kawalan Pergerakan Diperketatkan (PKPD) turut ditubuhkan di peringkat daerah yang diketuai Ketua Polis Daerah (KPD).

Jelas beliau, pasukan itu dianggotai secara tetap oleh PDRM, ATM, Rela dan APM termasuk pihak berkuasa tempatan (PBT).

"Pendekatan yang akan diambil oleh Pasukan Pematuhan ini adalah untuk memberi nasihat kepada orang ramai dan sektor industri.

"Pasukan ini juga akan memberi amaran jika tahap pematuhan masih tidak memuaskan.

"Sekiranya ada individu atau sektor industri yang masih gagal mematuhi peraturan setelah diberi nasihat dan amaran, maka Pasukan Pematuhan PKPD akan mengambil tindakan mengikut peruntukan dibawah Akta Pencegahan dan Pengawalan Penyakit Berjangkit 1988 (Akta 342)," tegasnya.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/pkpb-pdrm-tubuh-task-force-operasi-pematuhan-241596>